

Ambienc de lurier segn e segures

La classes VB de l'an passà e la IIIB de l'ITC de Pardac à tout pèrt a la campagna europeèna per la segurezza sul lurier

Scola - "Ambienc de lurier segn e segures" l'é na campagna europeèna endrezèda da la Agenzia Europea per la segurezza e la sanità sul lurier (Osha) per i egn 2008 e 2009 con chela de envièr via na gestion integrèda a la valutazion di risesc sul lurier.

Chesta campagna é pontèda via da l'idea che la valutazion di risesc sie te duc i pajes de l'Union Europeèna la basa da olà pontèr via per lurèr su la segurezza e la sanità sul lurier. Se defat l prozess de valutazion del risch no vegn fat delvers o amò piec no vegn fat nia deldut, l'é senester meter a jir mesures preventives. La valutazion del risch cogn tegnir cont di particulères besognes di dadores de lurier, de l'evoluzion del mond del

lurier e de n percors che tole ite duc i enteressé sul post de lurier. Te chesta campagna l'Agenzia Europea per la segurezza e la sanità sul lurier se à dat jù te la comunicazion di prinzipies generèi de la valutazion del risch, sun sia emportanza per na prevenzion ascorta e sul fat che la valutazion del risch é de oblianza.

Chesta campagna à tout ite n muie de sogec: dadores de lurier, lurieranc, raprejentanc de la segurezza, operadores, servijes de prevenzion, responsàboi de la politica e autra pèrts enteressèdes al miorament de la valutazion del risch. Ence i studenc de l'ITC de Pardac à tout pèrt a chesta campagna. I lurieres te clas é ponté via jà l'an passà coi studenc de la VB che aea tout pèrt a la setemèna

europeèna sul lurier endrezèda da la European Agency for Safety and Health e chest an i protagonisé é stac enveze i scoles de la IIIB che se à tout sù l projet de la segurezza sul lurier. L'é stat enjignà na mostra olache sarà l met de veder l materièl informatif su la campagna e se pel ence veder desvalives filmac Dvd e n Cd informatif enjignà dai studenc per i joegn lurieranc e no.

La mostra vegn averta da doman da les 10 a les 12 e domesdi da les 14 a les 16 e la é a la leta de comuns, enc enteressé, scoles e privac, ma demò sun prenotazion. Se pel chiamèr la scola al numer 0462.501373, responsàboi del projet l'é la professora Antonella Baccolo e la studentes Nicole Vanzetta e Vanessa Fontanari.



I studenc che à tout pèrt al projet.